

Qarasaasiami nassatassamillu nunatsinni ilisarnaammik peqalernissamut atatillugu inatsiliornerup piaartumik aallartinneqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartuni ilaasortaq Michael Rosing, Attaviitsoq.)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Siullermeerinnineq

Naalakkersuisut Inatsisartuni ilaasortaq Michael Rosing, Attaviitsoq, qutsavigaat aalajangiiffigisassatut siunnersuummik matuminnga saqqummiussineranik.

Nunamut tamarmut atuuttumik kinaassutsimut uppersarsaat nunap iluani kinaassutsimut uppersarsaatitut atorreqarsinnaavoq, imaluunniit nunani EEA-mi (European Economic Area) ilaasortaasuni. EEA-mi ilaapput nunat EU-mi ilaasortaasut, Island, Norge aamma Schweiz.

Danmark, Island, Norge aamma Tuluut Nunaat nunamut tamarmut atuuttumik kinaassutsimut allagartaqanngillat angalanermi atorreqarsinnaasumik. Norge-mi kinaassutsimut uppersarsaammik atortuulersitsinissaq sulissutigalugu 2007-imi aallartinneqarsimavoq, atortuulissallunilu 1. april 2018. Nunat EEA-mi ilaasortaasut sinnerisa nunami tamarmi atuuttumik kinaassutsimut uppersarsaat atortuulersissimavaat, angalanermi uppersarsaatitut atorreqarsinnaasoq Schengen-ip ingerlatsivigisaani, taamalu aamma nunatsinni atorsinnaasutut.

Naalakkersuisut piaartumik aallartinniarpaat innuttaasup kinaassutsimut uppersarsaatissaanik ineriartortitsineq, atortuulersitsiartuaarnissaq aamma ingerlatsilernissaq, maanna sumi najugaqarnermut uppersarsaammut taarsiullugu periarfissatut.

Digitalinngortitsiartuaarnermut periusissiamik nutaamik suliaq tulleg aallartereerpoq. Naalakkersuisut tassani innuttaasup kinaassutsimut uppersarsaatissaanik ineriartortitsineq ilanngunniarpaat, taamaasillunilu periaatsit nutaat ilanngunneqarsinnaassammata nunamut tamarmut atuuttumik kinaassutsimut uppersarsaatissami, innuttaasumut namminermut pisortallu ingerlatsinerannut iluaqutaasussamik. Taamaaliornikkut aaqquissuussinermi nutaami periarfissat nutaat nalilersorneqarlutillu tulleriaarinerni ilanngunneqassapput digitalinngortitsinermi suliniutinut allanut atasumik, aamma taakkua nunatsinni iluaqutsissiinissaannut atatillugu.

Taamatut oqaaseqarluta Naalakkersuisut siunnersuutip akuersissutigineqarnissaa inassutigaat.